


99er Bäsefrässer Fasnacht 2018

Dr BiBo mit dr Neuerschiinig möchti allne gfalle.
Mir finde au, das Facelift miecht gar käi schlächti Falle.
Me chönnt jetzt in dr Redaggtion au modärnisiere
Und s'Üssere vom Chefredaggtter zünftig renoviere.



Refrain:

Und nach däm Väärs, dörfsch nit vergässe,
wämmmer none Bääse frässse.

E Gschäft vorstelle, e Aasproch halte, sie redet do und dört
Sie redet gärn, sie redet viel, schad, dass me's nid hört
Wenn me aber weiss, was d'Virginie so vo sich git
Isch me plötzlich wieder froh, me verstohrt se nid.

D'Frau Kämpfer chunnt vom Dorfplatz häi und säit zem Maa: „My Seel“,
jetzt hämmer z'Därwil none Gschäft, i glaub dört git's Kamel.
Dr Oski goht go luege, bstellt dört e Stange hell,
und schimpft dehái: „so lies doch rächt, s' isch s'Kaffi K-M-L.

Am Palmsunntig duet dr Ralf, mir finde das verwäge
Keini Palme sägne, worum isch är drgäge?
will bi uns in dr Pfarrei, mir mache jedi Wett
Nit nur s'Kirchedach, e bitz e Schade het

Dr Wärghof Chef Gaddaffi, wird jetzt pensioniert
Was bi ihm, me chas verstoh, zummene Depressionli fiehrt
Nümm organisiere, nümm befähle, jä s'Läbe das isch rau
Jetzt muess är deheime sy und Chef dehei isch d'Frau

Nach Davos, do het dr Trump nach Därwil welle cho
Do winggt dr Reto ab, das chönne mir verstoh
Mir hänn kei Hotel do im Dorf, seit är liicht verdrosse
Und die passend Unterkunft im Leue, isch scho gschlosse

Dr Jason isch Europameischter e Champion, e Smarte
Mir kenne Ein, wo schnäller isch, är müssti nur no starte
Athletisch, wie n är beinelet und über d'Hürde fliegt
Wenn dr Möschtli hört, dass är am Ziel e Stange kriegt

Z Ettige gitts e Dorffescht, mir finde das famos
Aber, glaubet uns, das isch für d Gugger e Nummere z gross
Vo uns e kleine Gratistip, ihr sind halt scho Duubeli
Wenns guet cho soll, nämet doch, dr Hegge und dr Hubeli

Landfescht-Song (Melodie ja so warn die alten Rittersleut)

Sigs bim baue oder feschte
unser Bauteam, das isch's Beschte
aber denn gheit, o wie dumm
dr Migros Booge zweimal um

Aber susch, aber susch, aber susch isch alles super gsi
Aber susch, aber susch, isch s Landfescht super gsi

Dr Notusgang im Zält blibt frei
dr Sicherheits Chef Schänggeli macht es Gschrei
dr Damiano goht das gar nüt aa
är stellt d Muusig vorne dra

Wenn dr Möschtl seit, do bohre
gwaggle am Lättli sini Ohre
är bohrt denn gliich mit finschterer Miine
z'mittst in d'Wasserleitig iine

Hätt dr Muni e Flaade gheie loo
wär am Weggli si grosse Uftritt cho
schuuflen dr Flaade furt und putzt ihm s Füüdli
das wär's gsi, sis Schissdrägg Zügli

Dr Metzger Matthis dreit ganz fescht
d Würschtl für dä Klöpfer Tescht
dreit und dreit und vergisst drby
dass d Gescht im Zält am verhungere sy

Dr Gäldbärg wachst, me jublet im Chor
Dr Heggedorn springt zum Nacht-Tresor
Är stopft die Nötli motiviert
In Tresor, bis dä kollabiert

D Bäsefrässer wünsche Euch e wunderschöni Därwiler Fasnacht 2018